

西山日記一

涵芬樓
第七集

涵芬樓祕笈第七集

目錄

西山日記四冊

舊鈔本

續名賢小記一冊

吳枚菴手寫本

土苴集一冊

明正德刊本

道餘錄

舊鈔本

几上語枕上語

舊鈔本

三種合冊

存復齋續集一冊

舊鈔本

士直錄一冊

五編附本

蘇子瞻小疏一冊

身刻附本

齊山日誦四冊

附本

目錄

蘇子瞻詩集十卷

西山日記原本抄 目錄

上卷

日課

英斷

相業

延攬

才畧

深心

名將

循良

法吏

守死

刻本節烈

忠義

直節

器識

神識

古道

刻本古道日課俱入下卷

下卷

文學

師模

庭訓

正學



孝友

篤行

持正

德量

友義

清脩

恬退

高隱

格言

正論

清議

義俠

母範

賢媛

耆壽

清賞

鎮壓

談諧

因果

天數

方術

五歲

刻本增家訓篇原本分載入循吏庭訓諸篇內不另列篇目
其清脩德量正學三篇刻本移入上卷清賞鎮壓談諧因果
天數五篇從刪係康熙二十七年戊辰刊行與原本稍異

西山日記卷上

日課

故鄣丁元薦長孺父著



顧涇陽先生曰吾聞諸夫子於觀人得五案焉進狂狷賊鄉愿一也大受小知二也皆好不如善者好皆惡不如善者惡三也衆好衆惡必察四也觀過知仁五也

雷霆至不測從來未見殛死一正人虎豹至兇暴未嘗害君子觀史傳及耳目睹記皆然今之小人其不測過於雷霆兇暴甚於猛虎吾於出世法得二人焉一曰密藏其削髮迫於父母之變有奇才托

之方外具異骨死心真脩達觀和尚道行江左時密藏刺血上書勸
之遠避至今莫可踪跡見幾而作不俟終日密藏之謂乎一曰蓮池
棄其諸生真脩五十年臨化去呼其弟子曰吾初落髮時作火頭十
餘年托鉢十餘年狂心尚降不下趺坐禪床又二十餘年終能收攝
方寸吾去後汝輩各守舊規毋踰尺寸語畢坐化雲棲道場四方錢
糧甚多蓮池不一沾手即饋一菓一餌必與衆共之黃庭翠大衆語
予云我謁雲棲一切供奉衣食與大衆無二其他即近身小沙彌衣
食便爾分別况自供奉乎吾所以心折此老兢業、庸德庸言釋
門之王道也

雲間人乘蔡兵公海中丞時競以田產不明與文貞家聞文貞亦疑其諸子恣橫太常璫呼一老綱紀云誰為乃翁所手置者覓數契誘一二無賴以強占混告文貞大恚曰此乃老夫編脩時交易尚爾牽賴餘可知已遂曲庇諸子及舍人兒文貞明察乃墮太常術中莫知其子之惡聖賢所為長歎也

甲午長安有演蒙所講會主盟者焦弱侯鄒四山潘雪松楊晉庵從遊者姚養谷吾邑二朱舍人劉喜聞太史予初赴會顧涇陽先生意難之予曰無妨也弱侯大意以戒好名為第一義予曰所謂名者非孝弟忠信禮義廉耻乎此八者名之所從出也避名必且去其實可

乎試有千金於此畏清議故不敢輕受若等黃金於土塊吾不敢自信請諸公各於平旦捫心弱侯曰何必爾朱舍人從中和之予正色曰吾輩自檢辭受取予間稍不合禮義則家人門隸皆相顧竊笑主人演象所議論若何今乃爾自家心上打不過衆人身上自然打不過故惡其聲者亦羞惡之一端也若戒好名便到不好名此小人而無忌憚之根也諸君默然不數年主盟者相繼敗官而此會遂散

天理即是人情彼周旋世故圓轉時趣者其本心已失蓋不情之甚者也記曰人情者聖王之田天理之極則也

周末文勝至戰國而諸子百家倍蓰六經秦始皇出而以烈焰掃之
大是千古快事波及六經則矯枉之過也當時可漆可壁却是不曾
焚若決意必焚秦法至嚴何以六經留傳至今利口之覆邦家亦至
秦而極始皇一舉而坑之又是千古快事何以遷怒于儒非也叔孫
通魯兩生四皓伏生毛公穆生申公蓋公新城三老一留為高帝
用則當時所坑者反覆縱橫之尤非儒也此二事始皇大罪案却於
孔孟及世道亦有大功張問達首論李載贊竟被逮自刎獄中此四
明相業大是救世奇著後生小子惡拘檢而樂縱肆卓吾却與以好
題目新議論令悍然敢為無忌憚掃滅程朱正學近日世道人心至

於不可收拾者載贄之罪也于中甫曰卓吾才甚高識甚奇極聰明男子余曰要亂天下不是此等人不足以動衆將來有迷後世不獨目前之害所謂甚于洪水禽獸者此是也

史際明深闢禪學意在于中甫也予曰近世士大夫患其不禪若稍有禪意便是火坑中一帖清涼飲中甫始終不曾禪繆仲醇問以故曰近世學禪者盡是梁武正宗若達摩西來意邈然河漢久矣仲醇忽然作色

余戲謂中甫兄以達觀和尚真鳳凰耶當縱之九霄之外餐沆瀣飽霜雪若餌以參耆貯以金屋鳳凰決被痴人弄死不幸言而中悲夫

陳仲子一錢勝石尉百萬緡蓋布施決論其所從來釋迦牟尼不可欺也

佛氏割斷情慾棄五倫却父子一念終是放不下孟子所以動墨者以此即天命之性也吾友王孟夙棄官遊方外當今第一流人泰昌皇帝之喪予會於慧慶禪寺偶談及我兩人涕泗滂沱孟夙且曰此淚畜之已久恐為旁人所笑故忍而中止今遇同心者不覺沾襟予試問此淚却從何處來君臣之義無所逃于天地況父子乎

佛氏離父母却於死後脩行報無始以來父母恩不如見在養志養口體何等穩當曾子曰椎牛而祭墓不如雞豚逮親存也請下一轉

語曰刺血寫經不如竭力奉養

予侍許先生於檣李舟中語及養生送死無憾便是人子第一義先生曰何曰有心之感曰憾吾輩事父母體面上或說得過若偶有憾觸有許多刺心處口裏說不出譬如平日奉養曾子之酒肉亦不曾少却是受用祖宗見成的或朝廷俸祿比子路之負米便是一蔬一菜勝於酒肉即就必請所與一件何等委曲何等周至父母多少隱衷却在兒子面前說不出的或鍾情幼子及愛女或至親戚友心中所欲私厚誰能一一體貼得盡童僕其小者也酒肉其至微者也不得乎親不可以為人不順乎親不可以為子想將起來世之可以為

人子者少矣至於送死倉皇急遽中多少覲面錯過不能必誠必信後悔無及即有孝子於哭泣之哀亦能自致却比父母哭子必不能相當古人下一憾字儘有味先生為之憮然

天子之太廟七夫子之學宮郡邑各一獨浮屠之剝遍天下請郡縣各留佛寺一餘悉歸併擇真脩者禮之為佛弟子而汰其浮淫諸游食不逞者歸之農無令為奸人窟穴也士大夫及好事者有意佞佛歡喜布施以其貲為義倉義田歲可活饑民數萬多者佐邊餉之急免枵腹者于橫征歲可省郡邑敲撲即此是大功德大因果脩西方之實際也空口談涅槃委金錢無用之地非癡即愚

千古第一等事都是愚人做豫讓漆身吞炭三躍擊衣以報智伯天下之至愚也方遜志捐十族以殉建文君若一轉念便餒矣

子路夫子之益友也曾子、夏之益友也執燭童子曾子之益友也啟手啓足後尚有易簣一段工夫故曰君子之於道也沒身焉而已矣

子貢于夫子沒後尚能收攝亂齊存魯沼吳霸越於荒墟宿草中陶鑄一番是千古真精神能自掃却平生一切聰明才辯於枯槁寂寞中煅煉三年是千古大力量

顧博士謙服文康公曾孫也餽予以一墨刻大書學吃虧三字乃文

康手筆予曰念顧先生有言堯舜之道孝弟而已矣孝弟之道吃虧而已矣夫子之道忠恕而已矣忠恕之道吃虧而已矣孟子之道自反而已矣自反之道吃虧而已矣推而廣之曾子三省顏子不校皆然涉世久方知此二字有味

三十年前繆仲醇輒云求一避亂地今果然矣避亂不在地梁鴻之會稽管寧之遼東今作戰場留侯曲逆隱于兵間地亦何常之有嘗為子弟定五策一曰節儉二曰習勞三曰忍辱四曰廣慈五曰善下行此五者雖之四裔可也

世人遇一物輒曰有便宜否里中沈生曰汝家要便宜却不顧這人

夫便宜余為之惻然即此一念日夕墮落其中殊不自覺克之便可作賊非痛懲不能克也

達觀和尚嘗語予王文成有二律鐫廬山石壁甚佳考其年月正征宸濠時作也筆亦遒勁古人當倥傯軍旅神思安閑洒落才氣橫溢于篇什筆札間故能成大功惜其詩不記

寒素之家勤儉孝弟家雖不甚溫然內外大小一團和氣忽生一才智子弟又或取一哲婦狹小祖宗氣魄日夜營生幹理其所入較前數十倍父母亦鍾愛之鄉里奴僕嘖嘖稱歎微察其兄弟妯娌漸生嫌隙盖以才上人必不堪巧于多取必有受其虧者卒至骨肉成